

共同經課-1 創世記九章八節～十七節

8 上帝 kā 挪亞 kap 伊 ê kiáⁿ 講，9 我，我 kap lín 以及 lín ê 後裔立我 ê 約；10 亦 kap hiah-ê kap lín tī-teh 一切 ê 活物，就是 kap lín tī-teh ê 飛鳥、cheng-siⁿ，一切走獸；見若 tùi 大船出來地上一切 ê 走獸立約。11 我 kap lín 立我 ê 約；見有肉體 ê，無 koh hō 大水滅無，亦無 koh 有大水毀壞土地。12 上帝講，我 kap lín 亦 kap hiah-ê kap lín tī-teh ták 樣 ê 活物所立永世代 ê 約，是有記號。13 我將我 ê 虹 hē tī 雲裡，thang 做我 kap 地立約 ê 記號。14 以後我 hō 雲起遮地 ê 時，beh 有虹出現 tī 雲裡。15 我就記念我 kap lín 以及 ták 樣有肉體 ê 活物所立 ê 約，水無 koh 氾濫損壞一切有肉體 ê 物。16 虹 beh 出現 tī 雲裡，我 beh 看伊，hō 我記念上帝 kap 地上 ták 樣有肉體 ê 活物所立永遠 ê 約。17 上帝對挪亞講，這就是我 kap 地上一切有肉體 ê 物所立 ê 約 ê 記號。

共同經課-2 詩篇二十五篇一節～十節

1 大衛 ê 詩。1) 耶和華 ah，我 ê 心神仰望你。2 我 ê 上帝 ah，我平素 oá 靠你，m̄-thang hō 我見笑。M̄-thang hō 我 ê 對敵因為贏我來誇口。3 見若 thèng 候你 ê，的確無見笑；Hiah-ê 無緣故行奸詐 ê，beh 見笑。4 耶和華 ah，求你將你 ê 道路指示我，將你 ê 路途教示我。5 求你 chhoā 我 tī 你 ê 真理，koh 教示我；因為你是救我 ê 上帝。我 thong 日 thèng 候你。6 耶和華 ah，求你記念你 ê 憐憫 kap 你 ê 慈愛；因為這是古早以來常常有 ê。7 求你 m̄-thang 記念我少年 ê 罪過，kap 我 ê 過失；耶和華 ah，求你照你 ê 慈愛，因為你 ê 恩惠記念我。8 耶和華是好 koh 正直；所以伊 beh 指示罪人行正路。9 伊 beh 用公平引 chhoā 謙遜 ê 人，伊 beh 用伊 ê 道路教示謙遜 ê 人。10 見若守伊 ê 約，kap 伊 ê 干證 ê 人，耶和華款待 in lóng 是用慈愛誠實。

共同經課-3 彼得前書三章十八節～二十二節

18 因為基督也一 pái 為 tiòh 罪受苦，義 ê 替不義 ê，是 beh chhoā 咱到 tī 上帝；論肉體就受死，論神就得活；19 tī hit-ê 神也 bat 去傳道理 hō 監內 hiah-ê 神，20 就是早 m̄ 信 thàn ê，當上帝吞忍 thèng 候，tī 挪亞 ê 日，teh 備辦大船 ê 時，入 hit 內面 ê 人少少，只有八個，tùi 水得救；21 chit-ê 所關照 ê 洗禮 taⁿ 也救 lín，m̄ 是除去肉體 ê lâ-sâm，就是無 thang 責備 ê 良心 òng 上帝來求，是 tùi 耶穌基督 ê koh 活；22 伊已經去天裡，taⁿ tī 上帝大 pêng；chiah-ê 天使，kap 有權柄 ê，有氣力 ê，降服伊。

共同經課-4 馬可福音一章九節～十五節

9 當 chiah-ê 日耶穌 tùi 加利利 ê 拿撒勒來，tī 約旦河 tùi 約翰受洗禮。10 即時 tùi 水起來，就看見天裂開，聖神親像鴿 á 降臨 tī 伊 ê 頂面；11 koh tùi 天有聲講，你是我所疼 ê Kiáⁿ，我歡喜你。12 聖神即時逼伊去曠野。13 Tī 曠野四十日，tú-tiòh 撒旦試，也 kap 野獸 saⁿ-kap toà；有天使伺候伊。14 約翰已經關監，耶穌到加利利，傳上帝 ê 福音，講，15 日期滿 lah，上帝 ê 國近 lah；lín tiòh 反悔來信福音。